

Նամակ խմբագրութեան

«Լուսնայ» . . . ամսագրի Հ. խմբագրին

Նուստտիս «Մկա վախ չունիմ» գրքոյկի վաճառումից մինչև օրս ստացել եմ արդիւնք ընդամենը քսան ուռքլի, որպիսի գումարը սորա հետ ուղարկելով Ձեզ խնդրում եմ հասցնել այն Աղգիս Վեհափառ Հայրիկից հաստատուած Յանձնաժողովին՝ Կովկասու հայ արկածեալների օգտին գործադրելու համար:

Քաղցր է ինձ յուսալ, որ իմ բարեկամները կօգնեն ինձ աւարածելով այդ գրքոյկը իրենց շրջանում, որով հնարաւորութիւն կտան ինձ վաճառքի արդիւնքը գոնէ մաս-մաս ղրկելով՝ կատարել մասամբ իմ բարոյական պարտքը դէպի իմ թշուառացած բազմաթիւ քոյրերն ու եղբայրները:

Աստուածատուր Բէկ-Յովսէփեանց

20 մարտ 1906, Կարս:

■ Խմբագրութիւնս յիշեալ 20 ուռքլին ներկայացրեց թեմիս Սրբ. Առաջնորդին:

ՄԱՀՎՈՅԺ

† ՄԻՆԱՍ ԽՈՒՆՈՒՆՑ

Փետր. 26-ին Թիֆլիսում վախճանուեցաւ Մինաս Խունունցը 73 տարեկան հասակում: Հանգուցեալը շատ շատերին ծանօթ է. նա Շուշուայ յայտնի Խունունց տանից էր. մի խոհական և գործունեայ մարդ, որ իւր կեանքը դրեց ազգային գործերի վերայ: Նորա հասարակական գործունէութիւնը բազմադիւն էր և անշահասէր: Երկար տարիներ նա վարել է Շուշուայ ընտանական և Մարիինսկի դպրոցին կից յօգուտ չքաւոր աշակերտների հիմնած ընկերութիւնների գանձապահի պաշտօնը, ընտանական ուսումնարանի հիմնադիրներից մէկն էր, բազմամեայ քաղաքային դեպուստատ և վերջապէս օրինակելի երեցփոխան Դադանչեցւոց եկեղեցու: 8 տարի շարունակ՝ Շուշուայ յայտնի սովի ժամանակ մեծ ծառայութիւն է արել ժողովրդին հանգ. Մինասը թէ իւր կարողութիւնից և թէ հանգանակութեամբ:

Գօլիցինի ժամանակ հայոց կալուածների գրաւման ժամանակ իբրև երեցփոխան դիմադրութիւն ցոյց տալու համար՝ Մ. Խունունցը 1903 սեպտ. բանտարկուեց և 1904 թ. յունուարին աքսորուեց Զիստապօլ, ուր մնալով 8 ամիս՝ հիւանդացաւ և ընդհանուր ներման ժամանակ վերադարձաւ Շուշու: Թիւրք-հայ ընդհարումներին Շուշուայ հրկիզութեան միջոցին հիմնովին այրուեցան նորա երկու խոշոր տները բոլոր պատկանելիքներով, որից յետ Մինասը միմիայն մի ձեռք շորով իւր բազմանդամ գերդաստանով տեղափոխուեց Թիֆլիս՝ զուրկ ապրուստի ամեն միջոցից, ուր և զոհ գնաց իւր հասարակական պարտականութիւնների ճշտիւ կատարման:

Օրհնուած լինի նորա յիշատակը:

Լուսայ